

Bosna i Hercegovina
FEDERACIJA BOSNE I HERCEGOVINE
AGENCIJA ZA NADZOR OSIGURANJA
FEDERACIJE BOSNE I HERCEGOVINE
S A R A J E V O

"Službene novine Federacije BiH", broj 80/06

Na osnovu čl. 8. i 10. Zakona o društvima za osiguranje u privatnom osiguranju ("Službene novine Federacije BiH", broj 24/05), člana 11. Zakona o posredovanju u privatnom osiguranju ("Službene novine Federacije BiH", broj 22/05) i člana 16. Statuta Agencije za nadzor osiguranja Federacije Bosne i Hercegovine, Stručni savjet Agencije za nadzor osiguranja Federacije Bosne i Hercegovine, donosi

PRAVILNIK
O POLAGANJU STRUČNOG ISPITA ZA OBAVLJANJE
POSLOVA POSREDOVANJA U OSIGURANJU

Član 1.

Ovim Pravilnikom propisuju se uslovi i pravila polaganja stručnog ispita za obavljanje poslova posredovanja u osiguranju u statusu zastupnika u osiguranju ili brokera u osiguranju.

Član 2.

Uvjerenje o položenom stručnom ispitu za obavljanje poslova posredovanja u osiguranju izdat će se licu koje je položilo stručni ispit pred ispitnom komisijom za polaganje stručnog ispita za obavljanje poslova posredovanja u osiguranju (u daljem tekstu: Komisija).

Član 3.

Stručnom ispitu za obavljanje poslova zastupanja u osiguranju ili brokerskih poslova u osiguranju može pristupiti lice koje ispunjava sljedeće uslove:

1. da je državljanin Bosne i Hercegovine (u daljem tekstu: BiH) s prebivalištem u Federaciji Bosne i Hercegovine (u daljem tekstu: FBiH) ili strani državljanin s boravištem u FBiH;
2. da ima najmanje srednju stručnu spremu;
3. da se ne vodi krivični postupak, i da nije osuđivan za krivična djela;
4. da posjeduje radno iskustvo od jedne godine.

Strani državljanin pored znanja jednog od službenih jezika u BiH i uslova propisanih stavom 1. ovoga člana, mora priložiti dokaz o priznavanju istovrijednosti stranih školskih svjedodžbi i diploma, te potvrdu nadležnog tijela o stjecanju prava na radnu dozvolu.

Dokumenti iz stava 1. ovog člana ne smiju biti stariji od tri mjeseca od dana podnošenja prijave, osim dokumenta iz stava 1. tačka 2. ovog člana. Kopije dokumenata moraju biti ovjerene kod nadležnog organa.

Član 4.

Stručni ispit za obavljanje poslova posredovanja u osiguranju obuhvaća provjeru znanja iz područja prava, ekonomije, osiguranja i to:

- a)Pravo osiguranja,
- b)Obavezno pravo,
- c)Privredno pravo,
- d)Osnovi poslovanja društva za osiguranje.

Član 5.

Komisiju imenuje direktor Agencije za nadzor osiguranja Federacije Bosne i Hercegovine (u daljem tekstu: direktor Agencije za nadzor).

Komisija se sastoji od 5 članova, koji se biraju sa liste kandidata koju utvrđuje direktor Agencije za nadzor. Predsjednika i sekretara Komisije imenuje direktor Agencije za nadzor iz reda zaposlenika.

Sjedište Komisije je u Agenciji za nadzor osiguranja Federacije Bosne i Hercegovine (u daljem tekstu: Agencija za nadzor).

Način rada Komisije propisat će se Poslovníkom o radu, koji donosi direktor Agencije za nadzor.

Predsjednik, članovi i sekretar Komisije imaju pravo na naknadu koju utvrđuje direktor Agencije za nadzor.

Član 6.

Prijave za polaganje ispita za zastupnika u osiguranju ili brokera u osiguranju, podnose se Agenciji za nadzor, s naznakom: "Ispitna Komisija za polaganje stručnog ispita - zastupnik u osiguranju ili broker u osiguranju".

Uz prijavu kandidat je dužan da priloži i dokaze da ispunjava uslove za polaganje stručnog ispita utvrđene članom 4. ovog Pravilnika.

Istovremeno s podnošenjem prijave kandidat podnosi i dokaz o uplati naknade za polaganje stručnog ispita, koju utvrđuje direktor Agencije za nadzor.

Naknada iz stava 3. ovog člana predstavlja ostale prihode Agencije za nadzor i koristi se za pokriće troškova organizacije i polaganja ispita.

Kandidat koji je prijavio stručni ispit i uplatio naknadu za polaganje ali nije pristupio polaganju, može polaganje stručnog ispita prijaviti u narednom ispitnom roku, bez uplate naknade.

Član 7.

Ispit se polaže pismeno testiranjem.

Komisija sastavlja zapisnik o obavljenom ispitu. Zapisnik vodi sekretar Komisije.

Uspjeh na ispitu ocjenjuje se sa « položio » ili « nije položio ».

Kandidat koji nije položio ispit stiče pravo ponovno podnijeti prijavu za polaganje stručnog ispita po isteku roka od tri mjeseca od dana kada je utvrđeno da nije položio ispit.

Direktor Agencije za nadzor izdaje uvjerenje iz člana 2. ovog Pravilnika na osnovu dostavljenog zapisnika o položenom ispitu, u roku od 60 dana od dana položenog ispita.

Član 8.

Mjesto i vrijeme polaganja stručnog ispita Agencija za nadzor će utvrditi najkasnije 30 dana prije održavanja ispita i javno objaviti.

Kandidati su dužni podnijeti prijavu sa dokumentacijom Agenciji za nadzor za polaganje stručnog ispita najkasnije 15 dana prije održavanja ispita.

Informacije- obavijesti koje daje Agencija za nadzor bit će dostupne na službenoj web stranici Agencije za nadzor.

Član 9.

Agencija za nadzor može u saradnji s odgovarajućim institucijama i ustanovama, radi pripreme kandidata za polaganje stručnog ispita i radi stručnog usavršavanja ovlaštenih posrednika, organizirati ili odobriti obuke.

Član 10.

Program za polaganje stručnog ispita za obavljanje poslova posredovanja u osiguranju je sastavni dio ovog Pravilnika.

Član 11.

Ovaj Pravilnik stupa na snagu osmog dana od dana objavljivanja u "Službenim novinama Federacije BiH".

PREDSJEDNIK STRUČNOG SAVJETA
mr. Zaim Hećo, v.r.

Broj:1.0.-021-586-7/06
Sarajevo, 28.11.2006. godine